

IZVJEŠTAJ O AKTIVNOSTIMA EKO FORUM-a za period mart 2018. - mart 2019. godine

Redovna godišnja skupština održana je 23.3.2018. godine u Sali Gradske biblioteke Zenica. Na Skupštini su prezentirani i usvojeni izvještaj o radu i finansijski izvještaj za prethodnu godinu, kao i plan rada za 2018. Svi ti dokumenti su dostupni javnosti na web stranici Udruženja.

Na skupštini je prezentiran Izvještaj o radu za period mart 2017. - mart 2018.g. koji je dat na usvajanje i isti je jednoglasno usvojen, kao i finansijski izvještaj za 2017. godinu.

Tokom izvještajnog perioda održano je ukupno 9 sjednica Upravnog odbora i to 19.05., 09.07., 20.09., 8.10., 11.12., 21.12.2018.g. 4.2., 7.3. i 19.03.2019.g. a mimo ovoga održavani su i konsultativni sastanci pojedinih članova kada su bile u pitanju važne teme ili dogovori oko daljnjih aktivnosti.

U martu 2018.g. objavljen je dokumentarac o Zenici, zagađenju i ekološkom aktivizmu koji je uradila investiciona banka Nordea a autor je bio naš bivši sugrađanin Saša Bešlić.

29.03.2018.g. je u Hotelu „Dubrovnik“ održana završna konferencija projekta Energetsko siromaštvo. Učesnici su bili Caritas iz Švicarske, CEE-Tuzla, EF - Zenica i Sadnice mira - Zavidovići.

U okviru projekta ovog projekta, koji je u saradnji s Eko forumom realizovao tuzlanski Centar za ekologiju i energiju, provedena je anketa o načinima zagrijavanja domaćinstava u Zenici. Anketirano je ukupno 500 domaćinstava, a u uzorku je bilo i urbanih i ruralnih područja. Pri tom su objavljeni rezultati ankete, koji su pokazali zanimljiv omjer korištenih energenata, što baca sasvim novo svjetlo na česti izgovor zagađivača i njihovih pomagača iz organa vlasti da "puno više zagađuju kućna ložišta nego industrija": skoro polovina anketiranih domaćinstava i dalje koristi gradsko grijanje, oko 16% se zagrijava električnom energijom, a kućna ložišta čine oko jedne trećine ukupnog broja domaćinstava. Međutim, kad se uzmu u obzir vrste goriva, vidi se da ugalj koristi samo 0,4% domaćinstava, kombinaciju uglja i drveta 8,8%, a ostatak kućnih ložišta koristi samo drvo ili pelet. To znači da su emisije SO₂ iz kućnih ložišta koja koriste ugalj daleko ispod procenata kojima barataju oni koji štite velike zagađivače.

U aprilu 2018. prikupili smo podatke o deponiji Rača i objavili ih na našoj web stranici. Došli smo do podataka iz kojih se može zaključiti da grad Zenica izgubi oko 14 miliona KM zato što se deponovanje industrijskog otpada vrši bez naknade i bez okolinske dozvole. Nekoliko mjeseci nakon tog našeg reagovanja, gradsko vijeće je najavilo tematsku sjednicu o deponiji Rača.

Dana 9.4.2018.g. Glavni tužilac Kantonalnog tužilaštva ZDK utvrdio je da je prethodna odluka kantonalnog tužilaštva o neprovođenju istrage protiv privrednog društva ArcelorMittal d.o.o. Zenica, pravilna i zakonita. Time je neuspješno okončana naša pravna bitka pred kantonalnim

pravosuđem, a naš naredni korak je zahtjev Federalnom tužilaštvu Federacije BiH za preispitivanje ove odluke Kantonalnog tužilaštva.

18.04. 2018.g. su nam bili gosti iz Ambasade USA , dr. Molini Patel i Paul Volker koji su održali predavanje u Sali Metalurškog fakulteta na temu - Uticaj zagađenja na zdravlje ljudi.

23.04.2018.g. je u Čapljini – Hotel Mogorjelo, dodijeljena nagrada Šampion zaštite prirode BiH – Green Awards našem članu dr. Samiru Lemešu. Nakon nominacije EF i izbora glasanjem, nagradu je dodijelio Centar za razvoj i podršku iz Tuzle – CRP, uz podršku Ambasade Češke Republike, UNDP,GIZ i etitetskih Ministarstava za zaštitu okoliša Federacije i RS.

Dana 16.5.2018.g. održan je sastanak u Centru za okoliš na institutu "Kemal Kapetanović" u vezi zastoja u formiranju ovog centra. Dogovoreno je da se uputi urgencija vladi ZDK kako bi se ovaj proces konačno pokrenuo.

Dana 19.05.2018.g. smo u EF imali posjetu i intervju novinara sa Austrijskog radija.

Dana 21.5.2018.g. zajedno sa drugim ekološkim NVO iz BiH i predstavnicima Američke ambasade posjetili smo Federalno ministarstvo okoliša i turizma. Podsjetili smo ih da je još u aprilu Ministarstvo trebalo Gradskom vijeću Zenice dostaviti izvještaj o realizaciji projekata iz okolinske dozvole za ArcelorMittal izdate prije 13 mjeseci. Obećali su nam samo da će uskoro biti organizovan sastanak na tu temu, da znaju da te mjere nisu realizovane, da Rača i dalje radi bez dozvole, a za sve su krivi inspekcija i federalni parlament. Barem tako kažu u Ministarstvu.

Dana 23.05.2018.g. je održan sastanak FOKUS grupe u EF Zenica. Tema je bila Energetska strategija BiH, a sastanku su prisustvovali predstavnici EF, CEE iz Tuzle, Fondacije Henirich Bell Stiftung iz Sarajeva.

Na poziv Švedske ambasade, učestvovali smo na prezentaciji projekata zaštite okoliša u Sarajevu 6.6.2018.g. pri čemu je prezentiran i rad EF.

Tokom juna 2018.g. pripremali smo aplikaciju za projekat Pecaenexus., na koji je i poslana prijava a čiju realizaciju očekujemo ovih dana. Već je obavljeno nekoliko sastanaka sa akterima projekta.

Dana 9.7.2018.g. objavili smo obnovljenu listu zahtjeva koju smo prvi put objavili na protestima 2012. godine, jer većina naših zahtjeva nikad nije ispunjena.

U julu 2018.g. raskrinkali smo najavu menadžmenta ArcelorMittal Zenica da će slati radnike na čekanje zbog uvođenja carinskih kvota od strane EU, jer smo očekivali da se taj izgovor koristi za odlaganje ekoloških projekata u toj kompaniji.

Takođe smo upozorili javnost da ArcelorMittal koristi situaciju sa uvođenjem carina EU-SAD kao izgovor za kašnjenje okolinskih projekata, kako bismo spriječili zloupotrebu i dezinformisanje javnosti.

Dana 17.07.2018.g. smo prisustvovali sastanku u Gradskoj upravi Zenica, povodom projekta SECAP – Akcioni plan zelenih gradova, kojeg vodi UNDP. Tema je Energetski održiv razvoj i klimatske promjene.

Tokom jula mjeseca ugostili smo novinare Radija Slobodna Evropa i nekoliko freelance novinara iz Italije koji su snimali reportaže o našem aktivizmu.

Dana 16.8.2018.g. navršilo se punih 14 godina od prodaje profitabilnog dijela zeničke željezare za 2 dolara. Tu godišnjicu obilježili smo javnim objavljivanjem činjenica iz Ugovora o dokapitalizaciji, koji Vlada FBiH i dalje krije od očiju javnosti, jer je označen kao "strogo povjerljiv" i predstavlja poslovnu tajnu.

Dana 18.8.2018.g. delegacija Eko foruma posjetila je aktivistice u Kruščici kako bi iskazali podršku njihovoj borbi za očuvanje rijeke od tajkunskih investitora koji namjeravaju graditi mini hidroelektrane u vodozaštitnoj zoni iz koje se Zenica snabdijeva vodom.

Dana 24.8.2018.g. članovi i simpatizeri Eko foruma Zenica posjetili su projekciju filma "Plavo srce", kod Mosta hrabrih žena u Kruščici. Zeničani piju vodu iz Kruščice, a izgradnja hidroelektrana u području vodozahvata mogla bi ugroziti to izvorište. Nažalost, malo Zeničana je spremno podržati borbu mještana Kruščice koji se već duže vrijeme suprotstavljaju nastojanjima tajkuna da ovu vodu otmu radi vlastitog profita. Pokazali smo našim odlaskom na projekciju filma da nam je stalo do vode, pravde i čistog okoliša.

S obzirom da je Kantonalno tužilaštvo ZDK odbilo da provede istragu o zagađenju okoliša u Zenici, a da se za ista krivična djela vodi istraga u Lukavcu, Eko forum je 27.8.2018.g. glavnom federalnom tužiocu Federalnog tužilaštva Federacije BiH uputilo zahtjev za sprovođenje krivične istrage.

Friedrich-Ebert-Stiftung BiH i Forum lijeve inicijative (FLI) organizovali su omladinsku konferenciju VUČKO od 29.08. do 02.09.2018. u Sarajevu, a tema konferencije su "Klimatske promjene i ekološki održiv način privređivanja". Učesnici su mladi iz čitavog regiona jugoistočne Evrope. U okviru programa oko 70 učesnika je posjetilo dva postrojenja za proizvodnju struje iz obnovljivih izvora energije u Vitezu i u Kaknju, a sa predstavnicima Eko foruma Zenica 31.08.2018.g. u lokalnoj razvojnoj agenciji ZEDA razgovarali su o prijetnjama koje zagađenje zraka, voda i tla nosi sa sobom. Nakon prezentacije "Industrijsko zagađenje: problemi i rješenja", učesnici su vodili diskusiju o tome šta mladi ljudi mogu uraditi kako bi se stanje sa zagađenjem popravilo. Glavna poruka bila je da je moguće imati i zaposlenje i čist okoliš, ali da

to zahtijeva znanje, vladavinu zakona i odgovornost, kako industrije, tako i organa vlasti. Iako su neki učesnici postavili pitanje do kad se Eko forum namjerava "boriti s vjetrojačama" jer su stekli utisak da se ne nazire kraj borbe s problemima zagađenja, bilo je i pozitivnih komentara, pa su neki od učesnika izrazili želju da se pridruže Eko forumu kao aktivisti.

Federalnom ministarstvu uputili smo zahtjev da realizuje obavezu iz okolinske dozvole: da se jednom godišnje izvrši kontrola realizacije mjera iz okolinske dozvole. Ministarstvo i inspekcija su 30.8.2018.g. izvršili kontrolu i skraćenu verziju rezultata kontrole su objavili na web stranici Ministarstva. Uvidom u te podatke, saznali smo da je od 24 planirane mjere za smanjenje zagađenja, od izdavanje dozvole do danas realizirana samo jedna. Sve ostale mjere kasne, ili uopšte nema informacije o tim mjerama. Rokovi za realizaciju 14 mjera su već istekli, a za 4 mjere se u izvještaju tvrdi da su navodno započele, ali će kasniti bez obrazloženja i bez ikakvih sankcija. Nakon što smo te podatke objavili na našoj web stranici, reagovala je kompanija ArcelorMittal tvrdeći da su oni u stvari "započeli ili realizovali" čak 82% planiranih mjera, što je daleko od istine.

Dana 11.9.2018.g. učestvovali smo u radu konferencije "Akcioni plan zelenih gradova" EBRD, kada smo pokušali istaknuti ključne okolišne probleme s kojima se Zenica suočava a koji bi morali biti obuhvaćenim tim planom.

Dana 16.9.2018.g. organizovali smo posjetu novinara iz Holandije koji su snimili reportažu o našem aktivizmu i problemima s kojima se borimo.

Dana 24.9.2018.g. održana je javna rasprava u postupku izdavanja okolinske dozvole za novu toplanu koju zajednički namjeravaju graditi ArcelorMittal Zenica, grad Zenica i partneri iz Finske. Uspjeli smo doći do kompletne dokumentacije, kako bi se javnost na vrijeme mogla pripremiti za tu javnu raspravu. Na našoj web stranici objavili smo dokumentaciju do koje smo uspjeli doći i naš osvrt na njen sadržaj. Studija nije ispunila svoju osnovnu funkciju - da procijeni koliki će biti utjecaj ovog postrojenja na okoliš, iz razloga što je još uvijek nepoznat udio pojedinih izvora zagađenja na zenički zrak, jer registar zagađenja ZDK još uvijek ne postoji, iako je ZDK izdvojio značajna namjenska sredstva za njegovu izradu. Zanimljivo je da je na čelu tima za izradu registra isti "ekspert" koji je voditelj tima za izradu ove Studije.

Na zahtjev Eko foruma, Fond za zaštitu okoliša FBiH dostavio nam je 18.9.2018.g. podatke o naknadama za zagađenje zraka, koju su obavezni plaćati svi veliki zagađivači. Ta obaveza je uvedena 2011. godine, da bi se u praksi realizirao princip "zagađivač plaća" iz Zakona o zaštiti okoliša FBiH. Na osnovu dostavljenih podataka utvrdili smo da jedino Gikil Lukavac nije plaćao naknade za emisije u zrak i da je to u stvari osnovni razlog zbog kojeg su ministarstvo i tužilaštvo drukčije postupali nego u slučaju Zenice.

Dana 25.09. U Hotelu Pahuljica na Vlašiću je u organizaciji OSCE-a održan Forum – Ljudska prava i mir, gdje je učestvovao i EF. Pod ljudskim pravima je potencirano i pravo na zdravu okolinu i pristup pitkoj vodi.

Dana 8.10.2018.g održan je sastanak Upravnog odbora Eko foruma s partnerima iz PeaceNexus fondacije u vezi realizacije projekta "Dijalog industrija – civilno društvo".

Od oktobra 2018.g. do februara 2019. održan je niz sastanaka s regionalnim uredom OSCE (9.10.2018, 19.10.2018, , kako bi se razmijenile informacije i kako bi se Eko forum Zenica uključio u mrežu Arhus centara u BiH.

Dana 24.10.2018.g. posjetio nas je američki ekspert Bob Wanderpool iz američke agencije za zaštitu okoliša EPA.

Dana 7.11.2018.g. su predstavnici EF učestvovali na protestima protiv industrijskog zagađenja zraka u Lukavcu, na poziv nevladinih organizacija i građana Lukavca.

Dana 16.11.2018.g. je sniman dokumentarni film o Mittalu , zagađenju u Zenici i radu EF. Autor Nisvet Hrustić je sa predstavnicima EF obišao lokacije gdje su snimani pojedini kardrovi i date izjave.

Dana 18. i 19.11.2018.g. je u Mostaru održan forum o okolinskim dozvolama i studijama utjecaja na okoliš, na kojim je učestvovao veći broj članova eko-udruženja iz BiH. Organizator je bio Elan REC iz Sarajeva a EF je bio aktivan učesnik sa prezentacijom o OD za Mittal.

Dana 23.11.2018.g. učestvovali smo na konferenciji o energetskej efikasnosti u Tuzli u organizaciji Centra za ekologiju i energiju Tuzla.

Dana 27.11.2018.g. je u organizaciji WWF Adrija i CO SEED održan sastanak u Doboju sa temom Studije utjecaja na okoliša, na kojoj je aktivno sudjelovao i EF.

Od 28.11.2018.g. održana je četvorodnevna međunarodna konferencija "Borba protiv zagađenja zraka u industrijskim gradovima Evrope" u organizaciji Udruženja Arnika iz Češke Republike, u Ostravi. Deklaracija usvojena na ovoj konferenciji apeluje na međunarodne organizacije, vlade i javne institucije Evrope i zemalja bivšeg Sovjetskog Saveza da preduzmu aktivnosti u rješavanju problema zagađenja zraka, jednog od velikih egzistencijalnih izazova čovječanstva koji svake godine ubija 4,5 miliona ljudi. Na konferenciju su aktivno učestvovali i predstavnici Eko foruma, uz finansijsku podršku Friedrich-Ebert Stiftung fondacije.

Nakon medijskog pritiska koji smo napravili na TV N1 i Al Jazeera, Federalno ministarstvo je objavilo listu "neurađenih" aktivnosti koje su bili obavezni uraditi zaključcima Federalnog

parlamenta sa tematske sjednice održane u martu 2017.g. i u čijem smo formulisanju učestvovali i mi, a od 8 tada donesenih zaključaka nijedan nije realizovan.

Dana 4.12.2018.g. učestvovali smo na konsultativnom sastanku EU delegacije u BiH sa ekološkim organizacijama iz BiH na kojem smo delegaciju EU upoznali s aktuelnim problemima zaštite okoliša u BiH i posebno u Zenici.

U decembru 2018.g. Gradsko vijeće Zenice usvojilo je Nacrte regulacionih planova "Odmut, Jalija i Talića brdo", "Trg rudara" i "Privredno-poslovna zona Zenica-Sjever" i uputilo ih u javnu raspravu u trajanju od samo 10 dana. Učestvovali smo u raspravi i Vijeću dostavili naše pismene primjedbe i sugestije.

U povodu 10 godina od osnivanja, Eko forum Zenica dodijelio je 11.12.2018.g. zahvalnice najzaslužnijim pojedincima i organizacijama koji su do sada podržavali Eko forum u našoj borbi za istinu i pravdu a protiv zagađenja i korupcije, ali i "nezahvalnice" institucijama koje nažalost nisu ispunile svoj zadatak i koje su najzaslužnije za nepostizanje ciljeva koje smo sebi postavili prije 10 godina. "Nezahvalnice" će ostati u prostorijama Eko foruma kao upozorenje da dobitnici počnu raditi svoj posao, kad ćemo biti spremni da ih pretvorimo u zahvalnice.

Samo par dana nakon što smo im dodijelili "nezahvalnicu", Institut za zdravlje i sigurnost hrane Zenica je na svojoj web stranici objavio Demant navodne neistine iz našeg teksta objavljenog u povodu desetogodišnjice rada Eko foruma, odnosno zasluga za koje smo im dodijelili "nezahvalnicu" za "skrivanje podataka o zdravlju stanovništva i o efektima zagađenja na zdravlje, izbjegavanje odgovornosti i nesebičnu podršku zagađivačima". Umjesto demanta, objavili smo činjenično stanje – da nemamo odgovor na pitanje "Imate li podatke o broju oboljelih i o utjecaju zagađenja na zdravlje stanovništva?".

Dana 13.12.2018.g. navršile su se pune dvije godine od obećanja novog gradonačelnika da će "do 2018. zrak u Zenici biti kao u Briselu, kao u Belgiji". Taj dan smo se uvjerali da su koncentracije sumpor-dioksida bile "samo" 251 puta veće u Zenici nego u Briselu. Kao ni prije 2 godine, u Zenici opet nije proglašena epizoda uzbune, iako su za to bili ispunjeni svi zakonom predviđeni uslovi.

Dana 19.12.2018.g. prisustvovali smo prezentaciji publikacije o alternativnom prezentovanju podataka o koncentracijama prašine (izraženo u broju oboljelih) Instituta za zdravlje i sigurnost hrane. Nažalost, ta publikacija nije nam dala podatke koje tražimo već godinama – koliko je zagađenje krivo za narušavanje zdravlja stanovništva izloženog zagađenju.

Skupština ZDK je 20.12.2018.g. sa 15 godina zakašnjenja (od obaveze iz Zakona o zaštiti zraka FBiH) i 4 godine odlaganja, konačno prihvatila inicijativu da se pristupi izradi "Akcionog plana za

zaštitu zraka". Predstavnicima Eko foruma učestvovali su u radu Komisije za zaštitu okoliša Skupštine ZDK 10.1.2019.g. i pomogli da se ova aktivnost ubrza i da se više ne odlaže.

Gradskoj upravi smo dostavili svu dokumentaciju koju smo prikupili o industrijskoj deponiji Rača, na poziv gradskog vijeća za pripremu tematske sjednice.

Dana 8.1.2019.g. učestvovali smo na radionici EBRD Green cities u agenciji ZEDA.

Kantonarno tužilaštvo Kantona Sarajevo donijelo je 11.1.2019.g. nakon 3 godine i 4 mjeseca istražnih radnji, Naredbu o neprovođenju istrage protiv bivše ministricice Federalnog ministarstva okoliša i Turizma; i direktora Federalne uprave za inspeksijske poslove, kao službenih osoba u FBiH, za krivično djelo Nesavjestan rad u službi. Eko forum je uputio prigovor tužilaštvu, i još uvijek čekamo odgovor.

Dana 18.1.2019.g. održan je sastanak sa novim federalnim inspektorom za okoliš sa sjedištem u Zenici, s kojim smo razmijenili informacije kojima raspolažemo i dogovorili buduću saradnju na zaštiti okoliša i disciplinovanju velikih zagađivača.

Odlukom Evropskog suda za ljudska prava Italija je 24.1.2019.g. proglašena krivom zato što nije zaštitila svoje građane od zagađenja, što je dopustila zagađivačima da odgađaju projekte zaštite okoliša i što je građanima uskratila informacije o zagađenju i uticaju zagađenja na zdravlje. Takva odluka potvrda je naših nastojanja da se za ista prava izborimo u Bosni i Hercegovini i namjeravamo takvu apelaciju uputiti Sudu za ljudska prava čim se za to steknu svi uslovi.

U februaru 2019.g. analizirali smo materijale za gradsko vijeće koje je raspravljalo o nastavku saradnje s preduzećem Alba. Pozvali smo vijećnike gradskog vijeća da dobro razmisle o kvalitetu novog ugovora, jer se on zaključuje za narednih 20 godina, a ničim ne garantuje da će grad biti čišći nego što je bio do sada, samo garantuje da strani investitor i dalje ostvaruje profit. Jer nama su svakako strani investitori važniji i draži od nas samih.

Neformalna grupa građana Zenice zakazale je protestno okupljanje pod nazivom "Građanski protesti BEZ Kompromisa Mittal Napolje pravo na život", u nedjelju, 27.1.2019.g. na Trgu Alije Izetbegovića. Organizatori protesta su (s punim pravom) nezadovoljni rezultatima naše borbe za ekološki održivu Zenicu, neradom pravosuđa i beskrajnim kažnjenjem i odlaganjem ekoloških projekata u ArcelorMittalu. Morali smo objasniti javnosti da Eko forum NIJE organizator ovih protesta, i da se ne slažemo sa sloganom "bez kompromisa", jer smatramo da je moguće imati i industrijsku proizvodnju i zagađenje u prihvatljivom nivou, jer smo to vidjeli u drugim državama i to smo uvijek naglašavali.

Nakon sastanka održanog na inicijativu Federalnog ministarstva okoliša i turizma u prostorijama gradske uprave 19.2.2019.g. na kojem smo umjesto ministarstva i inspekcije analizirali i

kritikovali nerealizaciju mjera iz okolinske dozvole za ArcelorMittal (uz pasivno posmatranje federalnog i kantonalnog ministarstva, federalne inspekcije i gradske uprave) udruženju Eko forum dostavljen je nacrt okolinske dozvole za novu toplanu, koju zajednički namjeravaju graditi grad Zenica i ArcelorMittal sa partnerima iz Finske. Nakon uvida u nacrt dozvole, uočili smo brojne nedostatke, na koje smo ukazali podnosiocu zahtjeva za izdavanje (kompanija ArcelorMittal Zenica, odnosno preduzeće Toplana Zenica d.o.o.) i nadležnom ministarstvu.

Dana 27.2.2019.g. Kantonalni sud u Sarajevu donio je presudu u upravnom sporu koji smo protiv okolinske dozvole za BF čeličanu pokrenuli još 25.12.2015.g., ali još nismo dobili tekst presude.

Dana 28.2.2019.g. učestvovali smo na radnom sastanku regionalne mreže ombudsmana u Banja Luci s prezentacijom "Okolinske dozvole – (ne)efikasan instrument države". Dogovorena je saradnja s institucijom ombudsmana kojima smo uputili naše krivične prijave kako bi oni urgirali od nadležnih tužilaštava postupanje po našim prijavama.

Dana 9.3.2019.g. Eko forum je učestvovao na sastanku Eko-BiH mreže ekoloških organizacija iz Bosne i Hercegovine, koji je održan u Sarajevu. Zajednički smo utvrdili viziju, misiju i ciljeve mreže, a predstavnik Eko foruma je izabran u koordinacioni odbor mreže.

Tokom zime 2018/2019. iako su u Zenici koncentracije SO₂ često prelazile granične vrijednosti za proglašenje epizoda pripravnosti, upozorenja i uzbune, ni ove zime nijedna epizoda nije proglašena, nisu poduzimane nikakve mjere i nastavili smo se pretvarati da problem zagađenja zraka ne postoji i da će proći sam od sebe.

Na kraju, treba istaći da je EF kao i sve ove godine bio aktivan čitavo vrijeme a protekla godina je obilovala događajima i aktivnostima pa je kulminirala po broju istupa i reagovanja. Uz brojne istupe aktivista u elektronskim i printanim medijima, objavljen je i veliki broj priloga iz oblasti ekologije. Moramo istaći i činjenicu da nažalost nismo uspjeli privući veći broj simpatizera koji bi se aktivno uključili u borbu za zdrav okoliš, kao i da borba za finansiranje naše djelatnosti, odnosno pokrivanja troškova rada udruženja (zakup kancelarije, struja, internet, takse,...) ostaje jedan od prioriteta ubuduće.

U Zenici, 13.3.2019.g.

predsjednik udruženja Eko forum Zenica

Zlatan Alibegović